

estote in loco vestro et in devotione propositi vestri. Nolite derelinquere sanctissimum 801—802  
patrem vestrum<sup>1</sup>. State circa sepulchrum eius, quatenus ille preces vestras offerat  
omnipotenti Deo. Nolite concupiscere seculares vanitates, sed caelestes amate beatitu-  
dines. 'Et nolite', sicut doctor gentium ait, 'conformari huic saeculo, sed reforma- Rom. 12, 2.  
5 mini in novitate sensus vestri'. Turpe est enim monacho militiam spiritalem amittere  
et saecularibus se implicare negotiis.

Non sint murmurationes inter vos, non odia, non invidiae, non detractationes; et cf. 1. Petr. 2, 1.  
nolite iudicare alterutrum. Sed in humilitate et concordia omnes vestrae fiant actiones;  
oboedientes praepositis<sup>a</sup> vestris, non ad oculum tantum, sed ex corde, quasi coram cf. Col. 3, 22.  
10 Deo. Oboedientia vestra, caritas vestra, humilitas vestra notae sint omnibus; ut  
plurimi vestris bonis exemplis erudiantur et proficiant in salute animarum suarum.

Si vero venerandus pater Bouulfus<sup>2</sup>, dilectissimus meus amicus, non valeat pro  
infirmirate sua implere regularis vitae duritiam, vos illum iudicare nolite. Sed ex  
corde oboedite illi<sup>b</sup> et amate ut patrem. Quia ipse rationem redditurus erit de  
15 animabus vestris. Ille pro vobis laborat vagando et currendo, ut quiete vivatis<sup>c</sup> et  
regularem vitam vestram custodiat et corpori vestro necessaria habeatis. Vos vero  
facite sicut filii carissimi. Deum timete, Deum diligite, et curam sanctissimi patris  
vestri habete in orationibus vestris, quatenus longeva prosperitate vobiscum vivat  
feliciter et vobiscum, vosque cum illo, vitam habere mereamini sempiternam.

20 Adolescentulos vestros ammonete, instruite, docete in omni disciplina sancta et  
doctrina catholica, ut digni habeantur in loco vestro stare, et orationes pro<sup>d</sup> vobis  
dirigere, ubicumque maneatis. Ammonete eos de castitate corporis, de confessione  
peccatorum suorum, de lectionis studio et labore<sup>e</sup> manuum sine murmuratione, et de  
omnibus rebus, quae tali aetate necessaria videantur. Et illi subditi fiant senioribus  
25 et magistris suis humilitate bona, et relegione piissima. Et vos, seniores qui estis,  
bona eis praebete exempla, ut non solum verbis, sed vitae relegione vestrae erudiantur.  
Non sint luxoriosi, non ebrietati<sup>f</sup> servientes, non contemptuosi, non inanes sequentes  
ludos<sup>3</sup>, sed discant officiales esse boni in domo Dei, ut benedictionem et gratiam per  
intercessionem sancti Bonifacii patris sui a deo Christo recipere mereantur.

30 Meque deprecor, ut perpetua memoria habeatis vobiscum in sanctis orationibus  
vestris. Tempus enim adpropinquat, quod nullus effugere valet. Praeparet se unus-  
quisque, ut vestitus bonis moribus, non nudus appareat in conspectu domini Dei sui.

Direxi unum pallium storacium<sup>4</sup> ad corpus sancti Bonifacii patris nostri, de  
cuius sancta intercessione pro peccatis meis magnam habeo fiduciam, quatenus ego  
35 peccator vel veniam habere merear ea die, qua vestra sanctitas coronam recipiet  
beatitudinis aeternae.

Misi cartulam missalem vobis, o sanctissimi presbiteri, ut habeatis singulis diebus,  
quibus preces Deo dirigere cuilibet placeat: quando in honorem sanctae Trinitatis,  
quando de amore sapientiae, quando de penitentiae lacrimis, quando de caritate per-  
40 fecta, vel quando de suffragio angelico postulando<sup>g</sup>, vel omnium sanctorum cuilibet  
postolare placet; vel etiam si quis pro peccatis suis, vel pro quolibet amico vivente,  
vel etiam pro amicis plurimis, vel etiam fratribus de hoc saeculo recedentibus facere  
velit orationes; vel quando specialiter beatae Mariae genetricis Dei virginis perpetuae

a) propositis H.    b) illum H.    c) vivere H.    d) orationes pro scripsit J. pro orationum H.  
45 e) labores H.    f) ebrietate H.    g) suffragia angelica postulanda H.

1) sanctum Bonifatium.    2) Baugulfus abbas Fuldensis 780—802; de quo in *Annal. Fuldens.*  
(ed. Kurze p. 15) sic est ad 802: Eo anno Bougulfus, abbas Fuldensis coenobii, relicta quam habuit pote-  
state, Ratgarius successorem accepit. Alcvini vero epistola argumento est Baugulfum ideo abdicavisse,  
quod in monachorum suorum offensionem incurrisset. J.    3) Cf. supra p. 169 n. 4.    4) Cf. infra p. 413.